

Olimpia e Odessa: stories de spiritualità

"Il cielo anticipato" l'è l nef roman de Olimpia Rasom. L'è stat prejentà te Comun general de Fascia l di de la festa de la eles

Letradura - Stories de santità, stories de femenes valentes e de bon cher che dona sia vita ai etres e al Signoreddio, n'aoon sentù contèr te noscia cèses e vèlch una fosc l'aoon ence cognosciuda. L'era n'outa chela femenes che no se maridèa, che restèa te cèsa a didèr fora i genitores veies e malé, a portèr didament ai frèdes e a la sores canche nascea n picciol, l'era chela femenes che con gran abnegazion pissèa ai etres dant che a eles enstesses.

Una de chestes l'è stat Olimpia Crepez, nasciuda a Rèba ai 4 de mé del 1928 e morta de demò 28 egn, ai 11 de messèl del 1956, te sanatorie de Tione, olache la era stada ricoverèda per aer ciapà l mèl sech. Olimpia Crepez l'era l'ameda de Olimpia Rasom e apontin sun la vita de chesta sia ameda, la scritora da Pera à scrit sie nef roman dal titol "Il cielo anticipato".

N roman, descheche spiega Olimpia, che "trova ispirazion n muie ledia a chesta storia de santità, per recordèr na scelta de vita che aldidanché somea, ai eies de la maor pèrt de nos, assurda e belebon da no creer. Donèr la vita te l'acort più fon, considrèr l padiment n derit, se arbandonèr deldut a la volontà de Die con la segurezza de esser tel/con l Giust, l'è azions che fèsc nascer interrogatives forc. Soraldut a chi che, desche gé – scrif Olimpia Rasom – é ciapè ite en pruma persona per rejons de parentela."

Olimpia Crepez la é se n jita te na belà di de soreie

Olimpia Crepez l'era na tousa desche duta l'autres. La se aea



Le retrat de Olimpia Crepez.

enamorà de n tous da Pera, ge piajea jir da la petenadora e aer de bïe ciavei rencuré, ma da zeche ora la se mèla e la vegn portèda te sanatorie. Da chiò la ge scrif n muie de letres a sia mère, a sia amedes, ai frèdes, a la amiches, a la compagnes de l'Azion

Catolica. Letres che vegn conservèdes, recore che resta per semper tel cher, paroles contèdes te cèsa, testimonianzes. Nasc coscita l nef roman. Chiò l'inom de Olimpia vegn mudà te Odessa e ence gran pèrt di inomes di etres personajes vegn mudè fora. L'è ite vèlch referiment a chi de cèsa, ma per la maor pèrt se trata de finzion narativa.

Ai 2 de messèl del 1955 Olimpia Crepez va a Lourdes. No la domana de varir ma de aer amò n an de vita per preèr per la vocazions e la converscion di peccadores. N an giust dò chesta data la mor te sanatorie. Pare Frumenzio Ghetta de Martin l'ha testimonià che la é morta en "conzet de santità".

Odessa l'ha consacrà l'ultim an de sia vita al Signoreddio, l'è stat n an de grazia e de crousc, n calvarie volù e dejdrà. No la ge à mai dit nia a chi de cèsa, la ge scrivea letres de afet, la domanèa dò de la sanità de si familiares, con gran eneresciujum

per ic e per la val. La é se n jita te na belà di de soreie, canche somea che l ciel te saute ados.

N roman sugestif con n parfum de reèl

Ai 8 de mèrz, l di de la festa de la femenes, Olimpia Rasom e Lara Battisti, assessora a la valiva oportunitèdes del Comun general de Fascia, à prejentà la storia de Olimpia Crepez e con ela chela de outra femenes de spiritualità. Travers na trasmiscion che Olimpia aea fat per la RAI l'è stat l met de cognoscer la testimonianzes su Ester Ghetta e Teresina Weiss da Vich, Elisabetta Sommavilla da Ciampedel "Mama Betty" e Fiorenza Perocchio Gilli da Moena, femenes che à lascià segnes de gran fe. Amò aldidanché valguna vegn preèda per sia intercescion.

"Saer sentir la vita" l'è chel che é vedù te la stories de chesta femenes - à dit Olimpia Rasom. La spiritualità

l'è zeche de n muie personal, zeche da bel e da rèr, zeche de intim che no se vel spartir coi etres ma demò te n raport personèl con Die. Chesta femenes l'è zeche da bel, l'è de belà e bona persones. Ence Elisabetta Catez, beata Elisabetta de la Trinità, l'è stat na femena de spiritualità. Da na frasa touta fora da sie liber vegn l titol del roman de Olimpia Rasom. "L'è chest che à fat de mia vita, ge l confide, n ciel anticipà: creer che n Esser che à inom Amor stae te nos te ogne moment del di e de la net e ne domane de viver en comunion con Die."

"Il cielo anticipato" l'è quarto liber de Olimpia Rasom, dò "La gatte dei bottai", "Amichevole estate" e "Amor de fornejela" e i sacotenc reportage su gana magazine.

N roman sugestif, na storia con n parfum de reèl e de vivù, tel passà e tel prejent. Na storia da lejer coi sentiment, che ne mena te "n ciel anticipà".

Monica Cigolla



La prejentazion del nef roman de Olimpia Rasom te Comun general de Fascia con l'assessora a la valiva oportunitèdes Lara Battisti.